

Sunday, March 15, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



INTERNATIONAL DAY OF ACTION FOR RIVERS

Irrigation & Water Resources Department (IWRD) changtu Minister Pu PC Vanlalruata chuan Mizoramah lui lian tha a awm loh avangin tui hna siamtu lui te zawkte humhalh a ngaih thu a sawi.

International Day of Action for Rivers vawi 29-na puala nimina IWRD Auditorium, MINECO-a hun a hmanpuinaah Minister chuan he thu hi a sawi a, lui tui chu nunna hnar a nih thu leh humhalh a nih loh chuan thangthar lo awm zel tur te'n tui in tur an nei dawn lo ani ati a, sorkarin lui humhalh nan hma a la mek tih sawiin Mizo lo neih dan, tlang ram lo neih (shifting cultivation) aia hrisel leh chhehvel tichhe lo zawnga lo an neih theih na sorkar chuan tung cultivation leh permanent farming a

kalpui chho mek ani ati a, International Day of Action for Rivers chu ram luite humhalh an nh a, hmangaih leh duat taka enkawl a nih theih nan a tangkai tih sawiin kalkhawmte chu helam veina nena hma la a midangte zirtir zel turin a fuih a ni.

International Day of Action for Rivers hi kum 1997 khan Brazil-a ram hrang hrang intawhkhawmnaah lui humhalh a nih theih nan kum tina hman tura rel ani a, March ni 14, 1998 atanga vawiin thlengin khawvel puma hman a tan ani a, Mizoramah pawh nikum, kum 2025 atang khan hman tan a ni a, he ni pual hian inelna hrang hrang - reels insiamsiak, hla inphuahsiak leh lem inziahsiak te buatsaih a ni.



CHANCHINTHA THLEN NI

Vawiin hi Mizoram Presbyterian Kohhran chuan Chanchin Tha Thlen Ni atan an hmang a, Chawhnu leh Zan Pathian biak inkhawmah te thupui bik neiin hun an hmang ani.

Vawiin chawhnu inkhawmah, 'Buh seng tur a tam hle si' tih thupuia hmangin Kohhran tinah thuhiril tura ruat Upa te'n thu an sawi a. Zan inkhawmah, 'Tih makmawh - Chanchintha hril' thupui hamnga ngaihthlak ani ang. Chanchin Tha Thlen Ni pualin zan inkhawm bana ei leh in buatsaih kohhran an awm a. A tlangpuiin Kohhran hrang hrangte'n chawhma inkhawmah chuan dan pangngaiin Sunday School an kalpui a ni.

Kum 2012 khan Synod Inkhawmpui chuan Rev. William Williams-a'n Mizoram a lo luh ni, March Ni 15, 1891 chu Mizorama Chanchin Tha Thlen Ni atan a pawm a. Kum 2014 atang khan March Ni 15 chu Mizorama Chanchin Tha Thlen Ni atan hman ani. Kumin hi Chanchin Tha thlen atanga kum 135-na a ni ta a ni. Kuminah hian Chanchin Tha Thlen Ni hi Pathianni a nih avangin programme tum hnih, chawhnu leh zanah siam a ni.

VC Correspondent

Vawiin March 15, 2026 hi Mizoram Presbyterian Kohhran chuan Mizorama Chanchin Tha Thlen Ni atan hmangin kumin hi a vawi

135-na a ni a. Kum 1891 March Ni 15 khan Mizorama Chanchin Ṭha hriltu hmasa ber Rev. William Williams-a chuan Muallvûm kai, Kutbul lui chhuah a lo thleng a. He mi ni vek hian Liankûnga khua, Muallvûm naupangten Chanchin Ṭha thu leh hlate ngaithlain Bible milemte an dawng a. Hei hi missionary kâ aṭanga Mizoten Lal Isua chanchin kan hriat hmasak ber atan Presbyterian Kohhran te chuan an pawm a. Kum 1891 March Ni 20 khan Rev. William Williams-a chu Aizawlah lutin Pathian thu a sawi ṭhin a. April 17-ah Aizawl a chhuahsan a, April 22, 1891-ah Silchar a thleng thla leh a. Mizorama a awm chhung hi thla khat chuang a ni.



ZOBAWK ALL NGO

All NGO Zobawk North chuan vawiin khan a nau neih zawh hnuah thi Pi F. Lallawmkimi chungchangah thuchhuah an siam.

Thuchhuaha an tarlan danin Ningani kalta zan dar 6:30 a Pi F. Lallawmkimi (31), Pu PC.Lalremruata nupui, Zobawk North, Civil Hospital Lunglei a raicheha a boral chungchangah Civil Hospital Lunglei-a thawktute'n Pi F.Lallawmkimi khawlaia nau hring tawh an dawngsawng theilo chu hriatthiam harsa an tih thu an sawi a. An lung a dam thei lo tih tarlangin Civil Hospital a thawktute an dem takzet tih an sawi a. He thil thleng a mawhphurtute chungah Action na taka la turin Health Minister an ngen tih an sawi a ni.

All NGO Zobawk North chuan Pi F. Lallawmkimi'n a kalsan tak a fate enkawl nan zangnadawmna pek a nih theih nana hmalak sak turin Health Minister an ngen baw a. Hetianga mirethei leh dinhmun harsa zawkte chungah harsatna thleng ang hi tun hnuah Lunglei Civil Hospital-ah thleng nawn tawh lo se an duh takzet tiin thuchhuaha hian an tarlang a. Thuchhuah an siam chu tun thla ni 21 thleng an ngaichang dawn tih sawiin hmalakna a awm lo a nih chuan nasa zawk a lungawilohna lantir an tum thu an sawi baw.



SUPPLY DEPARTMENT

Food, Civil Supplies and Consumer Affairs department chuan sorkar laipui thupek angin tuialhthei leh eirawngbawlina gas renchem turin mipui te an ngen.

Ngenna hi department lam chuan mipui te hnenah an tlangzarh tawh a. Sorkar laipui Ministry of Consumer Affairs chuan sorkar laipui Ministry of Petroleum & Natural Gas atanga thu an dawn angin tunlai hian ram pumah eirawngbawlina gas leh tuialhthei hman tur India in chhekkhaw l tha mahse, tun dinhmunah middle east-a indona thleng mek avanga harsatna an tawh loh nan mipuite chu eirawngbawlina gas leh tuialhthei renchem a tul tih an sawi a ni.

Supply department chuan tunah hian a pangaiin tuialhthei leh eirawngbawlina gas lak luh reng a nih thu an sawi a, a bikin tuialhtheiah thlaphanna tur a awm lo tih an sawi a. Hetih rual hian tunlai boruak avanga engpawh thleng thei a nih avangin sorkar laipuiin lakluh theih zat bituk a siam tih an sawi a. Engpawh thleng se harsatna tawh loh nan tun atanga inremchem a pawimawh tih an sawi a ni.

